

Incumbensa Bigliel concernent la promoziun da nums da vias feminins cun metter a disposiziun ina glista cun propostas da nums sco basa da decisiun nunlianta per las vischnancas

Cumbain che circa la mesadad da la populaziun svizra èn dunnas, èn ellas fermamain sutrepreschentadas en il maletg da las vias respectivamain tar la denominaziun da las vias.

Vias, plazzas e monuments architectonics èn vegnids denominads en il passà oravant tut tenor umens. Uschia er en il Grischun. Politichers, eroxs da guerras, poets, filosofs ed artists scuntran ins surproporzionalmain savens en il maletg da nossas vias. Vias denominadas tenor dunnas chattan ins percenter darar.

Tenor l'artitgel 8 alinea 3 da la Constituziun federala han umens e dunnas ils medems dretgs. Quai duess esser il cas er tar la denominaziun da las vias, perquai ch'ils nums da las vias espriman tranter auter er ils svilups da la politica sociala e culturala. Da questa circumstanza duessi vegnir tegnì quint.

Tenor las cifras las pli actualas da l'Uffizi federal da statistica (UST) gudognan las dunnas anc adina damain ch'ils umens, quai che ha er da far cun la stima da lur prestaziun. Cun agid da vias denominadas tenor dunnas pudain nus contribuir che la prestaziun da las dunnas vegn stimada pli fitg e rendida visibla.

Las sutsegnadras ed ils sutsegnaders drizzan perquai la suandanta incumbensa a la Regenza:

1. Il chantun fa ina glista cun propostas da nums da dunnas ch'èn s'engaschadas u sa fatgas meritaivlas en moda e maniera particulara per il Grischun. Uschia po la glista cuntegnair er nums da dunnas betg grischunas.
2. I fiss giavischaivel, sche questa glista vegniss elavurada en collavuraziun cun il Post da stab per l'egualitad da las schanzas e cun agid da las federaziuns da dunnas. Da menziunar spezialmain en quest connex è il register da nums existent che vegn manà da l'Archiv grischun per la cultura da las dunnas.
3. La glista cumpilada e manada dal chantun cuntegna ina curta biografia da las dunnas respectivas e po vegnir consultada da la vischnanca sco basa da decisiun nunlianta per denominar novas vias. Las vischnancas restan er vinavant libras en la denominaziun da lur vias.
4. Il chantun renda attent las vischnancas al fatg che novas vias, plazzas e punts duain vegnir denominadas da preferenza tenor dunnas. Ina relaziun equilibrada da nums da vias masculins e feminins duai vegnir premissa en mira a lunga vista, n'è dentant betg lianta en ina moda u l'autra.
5. Nua che quai è pussaivel po ina tavla stradala complementara tematisar la biografia da la persuna, tenor la quala la via è denominada. Uschia èsi pussaivel da render visiblas en il spazi public l'activitad e la lavur da la dunna undrada. Las dunnas onuradas cun il num d'ina via duain uschia represchentar tut las dunnas ch'èn restadas invisiblas, malgrà grondas prestaziuns.

Per las sutsegnadras ed ils sutsegnaders vai unicamain per l'egualitad e per il tractament egual da las schlattainas. L'intervenziun concerna perquai exclusivamain la denominaziun da vias novas. La midada da nums da vias existents, en spezial da talas ch'èn denominadas tenor umens, è nungiavischada. Medemamain nungiavischada è mintga sort d'intervenziun en l'autonomia communal.

Tavau, ils 9 da december 2020

Bigliel, Müller (Favugn), Atanes, Cahenzli-Philipp, Cantieni, Caviezel (Cuira), Danuser, Degiacomi, Flütsch, Gasser, Hofmann, Holzinger-Loretz, Maissen, Perl, Preisig, Tomaschett-Berther (Trun), Wilhelm, Bürgi-Büchel, Fasani-Horath, Giudicetti, Hirsbrunner, Pajic, Stieger, Tomaschett (Cuira)